



## SIPA informisana o prijetnji upućenoj u SAD

Agencija za istrage i zaštitu BiH (SIPA) raspolaže informacijama o prijetećem anonimnom pozivu koji je iz BiH upućen u New York i preduzima potrebne mjere i radnje iz svoje nadležnosti, rečeno je za Srnu u SIPA. "SIPA raspolaže informacijama o navedenom događaju, o čemu je obavijestila Tužilaštvo BiH, te pod nadzorom Tužilaštva vrši provjere i preduzima potrebne mjere i radnje iz svoje nadležnosti", navode iz SIPA. Američki Fox 25 objavio je da je njujorška policija kontaktirala sa bostonskom policijom zbog anonimnog poziva koji je stigao iz BiH, a posredstvom kojeg je upućena prijetnja. Oni su naglasili da je analiza poziva pokazala da je pozivalac govorio nejasno, te da je moguće da je rekao da je riječ o prijetnji u Bosni, a ne u Bostonu. Poziv je, javlja Fox 25, stigao na broj za hitne slučajeve 911, nakon čega se u istragu uključio i FBI.

Istražni organi u SAD-u još utvrđuju ozbiljnost prijetnje, dodajući da lice koje je uputilo prijetnju nije govorilo o detaljima mogućeg napada. Bostonska policija je saopštila da će u narednom periodu njihovi pripadnici biti oprezni tokom patroliranja ulicama, te da će uputiti više svojih pripadnika na mjesta u gradu gdje se okuplja veći broj ljudi.